

古今名論

四







古今名喻目錄

七卷

一 六經諸子

二 有書不讀

三 補緝遺書

四 校書

五 與程伯大論文

六 與朱舉人論文

七 不朽自有真

八 談藝

九 文在養氣

十 文不期工

十一 舉業羔雉

十二 空文應世

十三 閉門操舟

十四 士與農賈異

十五 士貴務實

十六 言不可恃



十七 醉夢習俗

十八 學貴立志

十九 學貴自信

二十 學貴精專

廿 心無兩用

廿一 積學遠到

廿二 得意忘言

廿二 以物觀物

廿五 周子愛蓮

廿六 養魚記

廿七 盆魚說

廿八 湖山賦

廿九 吾心真樂

三十 山光觀我

三一 書法動靜

三二 五友序

三三 邃菴解

三四 藻軒解

三五 拙齋賦



八卷

一 稻粱醢毒

二 布衣粟食

三 厚積薄發

四 情因見遷

五 眇不識日

六 人自不察

七 水流至海

八 談虎色變

九 騎驢覓驢

十 人貴真知

十一 厲人自知

十二 太虛同體

十三 羅浮菰屋

十四 主心常存

十五 握之有要

十六 心統五官

十七 病瘡不發

十八 規矩尺度



十九 生意不窮

二十 大鵬圖南

廿 景星喬嶽

廿一 心脉心數

廿三 隨病立方

廿四 賣珠買櫝

廿五 學步邯鄲

廿六 正路與邪徑不同

廿七 自然奇怪

廿八 怪松圖讚

廿九 蠹魚篇

三十 蠹化篇

三一 投壺篇

三二 櫝星門記

三三 重脩儒學記

三四 釣臺亭碑

三五 養素齋記

三六 冷菴記

三七 常春園記

三八 竹鶴軒記



三九 碧梧丹鳳

四十 君子亭記

四一 觀德亭記

四二 萬松記

四三 性善對

四四 芸田說

四五 賀耕隱敖君壽序

四六 壽白耕居士



七言古詩

七言律詩

五言古詩

五言律詩

五言絕句

五言排律

七言絕句

七言排律

五言古詩

五言律詩

五言絕句

五言排律

七言古詩

七言律詩

五言古詩

五言律詩

五言絕句

五言排律

七言古詩

七言律詩

五言古詩

五言律詩



古今名喻卷之七

宛陵野史文臺吳仕期德望甫編輯

一 六經諸子

○夏虞之書渾渾爾商書灝灝爾周書噩噩爾大哉天地之爲萬物郭五經之爲衆說郭

○捨舟航而濟乎瀆者末矣捨五經而濟乎道者末矣棄常珍而嗜乎異饌者惡覩其識道也

○好書而不要諸仲尼書肆也好說而不見諸仲尼說鈴也

揚子

○太虛之寥廓萬象畢陳滄溟之渺漫衆流畢會聖



古今名  
書之浩汗至理畢具

瑩蟾子

○觀百物斯足以知化物之神聚羣言斯足以識聖  
言之大

墨子

○注清聽於九韶者已人之聲不能悅其耳享大牢  
於方丈者荼蓼之味不能甘其口

抱朴子

○六經奚從而病無聖人而病六經奚從而明有聖  
人而明大抵有日星則有彗孛惟鴻鈞一調而彗孛  
不能妖有英莖則有淫蛙惟玉律一正而淫蛙不能  
亂有六經則有異說惟聖人一出而異端不能鳴鳴  
呼煙橫泗丘苔侵魯壁漢之諸儒又皆人挾一椎鑿



家築一宮墻而聖人之六經化爲諸儒之六經矣世之君子徒知怨嬴氏之火罪諸儒之舌殊不知嬴火本不能焚經漢儒本不能病經經之病也無聖人主盟之耳是故鄒魯而有孔孟經不火矣下推漢唐而有犧文經雖火而不火也

誠齋

二 有書不讀

○象犀珠玉怪珍之物有悅於人之耳目而不適於用金石草木絲麻五穀六材有適於用而用之則敝取之則竭悅於人之耳目而適於用用之而不敝取之而不竭賢不肖之所得各因其才仁智之所見各



隨其分才分不同而求無不獲者惟書乎孔子聖人也而其學不廢於讀書當是時惟周之柱下史老聃爲多書韓宣子適魯然後見易象與魯春秋季札聘於上國然後得聞詩之風雅頌而楚獨有左史倚相能讀三墳五典八索九丘士之生於是時得見六經者蓋無幾其學可謂難矣而皆習於禮義深於道德非後世君子所及自秦漢以來作者益衆紙與字畫日趨於簡便而書益多其文章學術當倍蓰於昔人而後生科舉之士皆束書不觀遊談無根此又何也噫昔之君子何見書之難而今之學者乃有書而不



讀焉寧不爲可惜哉

蘇子

三 補緝遺書

○農夫祈寒苦雨深耕易耨播種五穀吾得而食之  
百工技藝作爲器用吾得而用之甲冑之士被堅執  
銳以守土宇吾得而安之却如此閒過了日月卽是  
天地間一蠹也功澤又不及民別事又做不得惟有  
補緝聖人遺書庶幾有補耳

伊川

○陸宣公之貶也杜門集古方書而已或曰避謫者  
歟或曰窮而不怨也楊子曰宣公之心利天下而已  
矣其用也則醫之以奏議其不用也則醫之以方書



有用有不用者宣公之身也宣公之心亦有用不用者乎哉

誠齋

○庖丁之妙寄於牛匠氏之妙寄於斤牛非庖丁也而非牛則無以妙庖丁斤非匠氏也而非斤則無以

妙匠氏

摘粹

○大匠以目中然未有離繩墨而巧者也醫以意中然未有舍方書而神者也

王氏

○善弈者不以譜而天下之弈者不可以無譜善醫者不以方而天下之醫者不可以無方

○將之覆車者相繼天下不疑兵書之難行醫之毒



人者相望天下不疑醫書之難用萬古六經反坐腐  
儒曲士輩而廢之耶

東萊

四 校書

○某也身處堂下眼在管中乃敢橫肆譏評點竄名  
作瑕指完璧光珠豈不罪哉夫栗然之色不以指而  
損美者以其璧真也淵然之光不以擇而亡圓者以  
其珠神也我公則神珠真璧某也雖妄可以逃罪矣

存簡稿

五 與程伯大論文

○古今能言之士孰不欲雄峙百代之上而垂聲乎



百世之下哉然而卒抱奇志而不見泯泯以老死者  
何其多也豈非才識之不逮故不能成一家之言以  
至此耳三代之後卓然成一家之言者纔十數人而  
止其餘皆磨滅斯盡則信乎得之於天者非超然而  
不羣則難乎其以文章自命矣此辱賜書大抵未能  
達夫雄深雅健之作而務爲浮薄靡麗之文而已此  
甚不可也僕聞古之爲文者必本於經而根於道其  
紀志表傳記序銘贊則各有其體而不可以淆焉而  
莫之辨也至其發言遣辭又奚以剽賊爲工哉今不  
本於經不根於道而襍出於百家傳記之說則其立



論不自其大而自其細固已自小矣尚何能與古人  
齊驅並駕哉老蘇之文頓挫曲折蒼然鬱然巉刻峭  
厲幾不可與爭鋒然而有識之士猶有譏焉者良以  
其立論之駁而不能盡合乎聖人之道也今無蘇公  
之才而立論又不如蘇公遠甚則何望其言之立而  
不什耶古之用兵其合散進退出奇制勝固神速變  
化而不可測也至其部伍行陣之法則繩繩乎其弗  
可以亂爲文而不法是猶用師而不以律矣古之論  
文必先體製而後工製譬諸梓人之作室也其棟梁  
榱桷之任雖不能以大相遠也而王公大人之居與



浮屠老子之廬官司之署庶民之室其制度固懸絕而不相侔也使記也而與序無異焉則庶民之室將同於浮屠老子之祠亦可乎鑄劍而肖於刀且猶不可斲車而肖於舟不猶以爲迂且拘乎韓子之於文惟陳言之務去今雖全未能如韓子亦宜少刊落矣乃悉古書奇字而馴集鱗次焉不幾於天吳紫鳳顛倒短褐也邪蘇子謂錦繡綺縠服之美者也然尺寸而割之錯而紐之以爲服則綈繒之不若今先生乃欲集羣英以爲華爲好其亦異於作者之見矣世有窶人爲覩其隣之富也日夜攻鑛而剽之幸而得其



貨寶財賄以爲得計矣一日徼者獲之則莽然盜也而  
至死不悟且役役焉割裂而綴輯之則其氣固已  
莽然矣又何能渾浩如江河而有排憂之力哉故夫  
闌茗翡翠又烏覩夫製鯨也且古之爲文非有心於  
文也若風之於水適相遭而文生也故鼓之而爲濤  
含之而爲漪蹙之而爲縠澄之而爲練激之而爲珠  
璣非水也風也二者適相遭而文生也天之於物也  
獨不然乎織者穠者丹者堊者莫不極其美麗而造  
物者豈物物而雕之哉物各付物而天下之巧莫加  
焉彼有昧於此者三年而刻葉且文猶樂也太古之



音和平雅淡而風俗以淳人心以正桑間濮上淫哇  
煩趣而人心風俗蕩而忘返使先生而與聞制作將  
安取乎則何獨疑於文也先生教之曰苟無毛嫵西  
施之美質則不能不借夫粉黛之假以掩其陋是朽  
木可得而雕糞土之墻可得而朽矣無鹽天下之極  
惡也被珠璣曳羅綺不足以欺天下之目使天下而  
皆瞽也則可奈之何天下之不皆瞽也先生殆未覩  
夫正色也先生又謂吾五常論其猶玄耶太玄擬易  
而作然易出於造化之自然而玄也者出於智慮之  
私而已故不能免夫牽合艱難之態先儒固已譏其



勞且拙矣故今去雄千餘年而卒無好之者今先生  
乃欲著書以擬玄吾恐其不堪爲覆瓿用矣先生又  
謂吾嘗作詩命其集曰胡盧且曾論詩序言詩之用  
若彼其博也而先生直以資人之笑視古詩之風亦  
少貶矣此亦好怪之過也先生卒教之曰其觀吾文  
也還以一言庶有以知君子之是是非非也宋之季  
年文章敗壞極矣遺風餘習入人之深若黑之不可  
以白當此之時匪返之則不足追乎古先生之心自  
以爲過之矣而烏知其異於彼也先生之文始欲其  
奇也而卒以拙始欲其麗也而卒以惡始欲其雄也



而卒以弱其風格言論莫不叛於古矣則亦難乎摯之矣且先生旣與吾異則僕雖言之而無當於其心矣僕欲挽先生於迷途則願悉吐出其中之蘊取韓孟文日夜誦之覺已之見與向者異焉然後一吐其辭庶有合乎僕於學廢棄之日常多加以怠惰不力然於作者之風致竊有見焉故敢畧陳其說其然之耶其不然之耶迷悟之機判於此矣幸毋忽

朱夏氏

六 與朱舉人論文

○迂叟平生於舉業本無解處近來時格予所未喻但謂文以氣爲主之一言卽孔子所謂辭達孟子所



謂說大人則藐之之遺意舉世狎爲腐爛常談不知其實乃不易之至論也比來從事舉業者徃徃似乎本之則無而刻意悉力搜剗洗鍊務欲眩巧逞奇不知却已耗意卒亦未嘗奇也是故所欲忠告於子者更少進焉恬虛以澄其神靜專以一其志精澗以致其思廣覽以博其趣範古以弘其體宛轉以暢其勢峻潔以莊其詞沈著以確其語時時遊息以達其生凡皆所以充吾氣也而又勿雜於異物勿奪於左見勿惕於得喪有承蜩之專有貫虱之巧有解牛之神於是胷中文思混浩流動勃勃欲吐角藝之場鼓勇



操銛而進無有司於其上無羣士于其旁無呵咩叱  
咤於左右矢口肆筆滾滾百千萬言似不經意而體  
製章法句法自然動中矩矱其間鋒鏑光芒望之可  
畏究之不可測隱然長江大河一瀉千里而灑瀕龍  
門時時激發奇壯極天下之偉觀渾雅寓夫精良險  
巖忽若夷坦如大行九折之坂造父飛轡越之猶行  
空然又如公輸子聖於巧而自不屑爲雕蟲末技也  
斯稱能言已乎具眼主司得之必將擊節歎賞夫洞  
心駭目之觀也已然上之儘有可論子如更端大叩  
迂叟雖病強當扶僊攝衣更僕授几一一爲子陳之



許雲邨

七 不朽自有真

○語云文章乃不朽盛事嘻文章豈真不朽者哉不朽固自有真也源之流本之榦一也不源之遡而以流不揣其本而以榦者非所以論文也期自丁卯應舉與叔祖廷謙廷弼二君偕從事於承芳書屋叔祖鼇潭翁示之曰子不觀夫水與卉乎蹄涔之細波非不雜然文也孰與江海洪流滔滔者之莫禦綺羅之剪綵非不炫人目也孰與萬紫千紅自然種種者之爲春知此可與論文矣期也混跡世塵雖無徵不信



然而創鉅昨非更祈新悟以得少窺其津涯者皆翁之陶鑄所及也昔公明宣學於曾子三年不讀書曾子曰宣而居參之門三年不學何也對曰安敢不學而居夫子之門噫宣蓋善學曾子者矣翁平居孝友豈弟與物無忤家庭中可範者真不愧於宣之所謂豈屑屑博士業爲哉建陽某氏聞而造焉懇求時義垂之不朽伯子敬叔乃出趨庭稿若干某受之如獲拱璧來索正於余而加諸梓猗歟翁其端本澄源者也源深則流長本固則枝茂自有真不朽者在矣故曰文以人傳非文能傳人也篤其實而藝者書之則



行之遠也奚疑哉因敢僭書之簡末

承芳新義跋

### 八 談藝

○夫六經而下文豈勝談哉左馬之古也董賈之渾也班楊之嚴也韓柳之粹也蘇曾之暢也咸炳炳朗朗千載之所共嗟也然其文馬不襲左而班不襲楊也柳不襲韓而曾不襲蘇也何也不得不同者文之精也不得不異者文之迹也論文而至於舉業其視文既已遠矣文而襲者舛也况拾世俗之陳言庸語而掇以成文又舛之舛者也今夫人性之有文也不猶天之雲霞地之草木哉雲霞之麗於天也是日月



生焉者也非以昔日之斷雲殘霞而布之今日也草木之麗於地也是歲歲生焉者也非以今歲之朽葉枯株而布之來歲也人性之有文也者時時生焉者也非以他人之陳言庸語而借之於我也故古之言文者得之心而發之文也其理之瑩也如金之精如玉之粹而天下之人莫之敢損益也其詞之溢也如長江如大河魚龍鼉鼉縱橫出沒而不可掩也其清通也如月之秋如江之澄如潭之寒而千里一碧泠然內徹也其古雅也如太羹如玄酒如周之彝如商之鼎令人覩之而徘徊太息棲神千載之上也其



明達也如青天如白日而有目者之所共覩也其飄  
逸也如佩玉鳴琚乘風御空可望而不可卽也其鏗  
鏘也如金石相宣絲竹並奏而聽之者靡靡忘倦也  
其艷麗也如芙蓉秋水之上而不色充燦不假雕飾  
也其嚴正也如達官貴人端冕而立乎朝廷之上見  
之者悚然動容也其雄渾也如鉅鹿之戰以一當百  
而人人戢伏不敢仰視也斯文之極也以之闡經則  
道德性命之精章矣以之論史則治亂興衰之繇達  
矣以之辨事則得失安危之機判矣辟之天之雲霞  
地之草木無所假焉者也左馬諸子之所不能易也



尚何以陳言庸語爲哉文賦云謝朝華之已披啓夕  
秀於未振諸生其舍爾糟粕茂爾精華吾將悚而覽  
焉

宗子相

九文在養氣

○昔之爲文者非能爲之爲工乃不能不爲之爲工  
也故三代盛時非徒王公大人之能文雖匹夫賤隸  
婦人女子發言吐辭有世之老師宿儒刻齒不能到  
者書而爲誥誓詩而爲雅頌自今觀之有如太虛寥  
廓萬象畢陳巨溟渺漫衆流畢會豈不全且盡哉七  
篇之文包羅天地輶輶上下自今觀之有如雲掃長



空畧無微翳凝空明鏡絕無纖疵豈不純且粹哉後世之文所以不孟氏如者非文之靡人不軻也

文贈

○士君子之衛道在氣而不在言其氣高則其言亦高其氣卑則其文亦卑譬如千仞之水決而注之川大木捍之排以巨峻迫以高麓而後怒號哮吼聲震百里抑之者愈大則其聲愈暴故小遏之則小鳴大遏之則大鳴孟軻之氣抑之而愈壯也

蘇子

○爲文必在養氣力可以舉鼎人之所難也而烏獲能之君子不貴之者以其局乎小也智可以搏虎人之所難也而馮婦能之君子不貴之者以其驚乎外



也氣得其養無所不周無所不極也攬而爲文無所  
不參無所不包也大道煙微文氣日削驚乎外而不  
攻其內局乎小而不圖其大春葩秋卉之爭麗也鸞  
號林而蛩吟砌也水湧蹄涔而火炫螢尾也衣被土  
偶而不能視聽也蟣蠓生死於甕盎不知四海之大  
六合之廣也斯皆不知養氣之故也

朱景濂

十 文不期工

○理勝者文不期工而工理愧者巧爲粉澤而隙間  
百出此猶兩人持牒而訟直者操筆不待累累讀之  
如破竹橫斜反覆自中節目曲者雖使假詞於子貢



問字於楊雄如刻五味而不能調和食之於口無一  
可愜何況使人玩味之乎故學文之端急於明理夫  
不知爲文者無復道如知文而不務理求文之工世  
未嘗有是也夫決水於江河淮海也水順道而行滔  
滔汨汨日夜不止衝砥柱絕呂梁放於江湖而納之  
海其舒爲淪漣鼓爲濤波激之爲風颭怒之爲雷霆  
蛟龍魚鼃噴薄出沒是水之奇變也而水初豈如此  
哉順道而決之因其所遇而變生焉溝瀆東決而西  
竭下滿而上虛日夜激之欲見其奇彼其所至者蛙  
蛭之玩耳江河淮海之水理達之文也不求奇而奇



至矣激溝瀆而求水之奇此無見於理而欲以言語  
句讀爲奇之文也六經之文莫奇於易莫簡於春秋  
夫豈以奇與簡爲務哉勢自然耳傳曰吉人之辭寡  
彼豈惡繁而好寡哉雖欲爲繁而不可得也

張文潛

士舉業焦雉

○自百家之言興而後有六經自舉業之習起而後  
有所謂古文古文之去六經遠矣由古文而舉業又  
加遠焉士君子有志聖賢之學而專求之舉業何啻  
千里然中世以是取士士雖有聖賢之學堯舜其君  
之志不以是進不得大行於天下蓋士之始相見也



必以贄故舉業者士君子求見於君之羔雉爾羔雉之弗飾是謂無禮無禮無所庸於交際矣故夫求工於舉業而不事於古作弗可工也弗工於舉業而求以倖進是僞飾羔雉以罔其君也雖然羔雉飾矣而無恭敬之實焉其如羔雉何哉是故飾羔雉者非以求媚於主致吾誠焉耳工舉業者非以要利於君致吾誠焉耳世徒見夫由科第而進者類多徇私媒利無事君之實而遂歸咎於舉業不知方其舉業之時惟欲釣聲名弋身家之腴以苟一旦之得而初未嘗有其誠也鄒孟氏曰恭敬者幣之未將者也伊川曰



自灑掃應對可以至聖人夫知恭敬之實在於飾羔  
雉之前則知堯舜其君之心不在於習舉業之後矣  
知灑掃應對之可以進於聖人則知舉業之可以達  
於伊傅周召矣

陽明子

十二 空文應世

○士之論政也猶農之論耕也主人而田者則必取  
其善論耕者問焉耕者以其言言之主人以其言信  
之遽厚其直而畀之以田然求其所謂耜耨之類則  
茫然無具也其主有不厭而去之者乎士之執空文  
以應世也何以異於是故余懼諸生之以空文而見



厭於世也

方孝孺

十三 閉門操舟

○世有閉戶而學操舟之術者何以舵何以棹何以艚何以帆何以引筭乃罔不講而預也及夫出而試諸山溪之濫大者風水奪其能次者灘漩汨其智其不覆者幾希何也風水之險必熟其幾者然後能審而應之虛講以臆度不足以擅其工矣夫山溪且爾而况江河之澎湃洋海之渺茫乎彼徒泛講而無實歷者何以異此

王廷相

十四 士與農賈異



○夫仕宦之道與農賈異夫農春舍於郊秋荷擔而入以困倉爲務者也賈子逐利於萬里之外賈巴蜀則以錦歸賈荆楊則以金歸以篋筥爲務者也儒者辭親而起家齋躬而事主困倉倒不爲羞篋筥空不爲屈以修身爲務者也

存筥稿

十五 士貴務實

○建厦屋者務其大而不務其實則大不盈丈而宇頽之矣築垣墉者務其高而不務其實則高不隱仞而基傾之矣

子華子

十六 言不可恃



○草木鳥獸之爲物衆人之爲人其爲生雖異而爲死則同一歸於腐爛漸燼而已而衆人之中有聖賢者固亦生且死於其間而獨異於鳥獸草木衆人者雖死而不朽愈遠而彌存也予讀班固藝文志唐四庫書目自三代秦漢以來著書之士多者至百餘篇少者猶三四十篇其人亦不可勝數而散亡磨滅百不一二存焉予竊悲其人文章麗矣言語工矣無異草木榮華之飄風鳥獸好音之過耳也方其用心與力之勞亦何異衆人之汲汲營營而忽焉以死者夫言之不可恃蓋如此今之士莫不慕古聖賢之不朽



古今名喻  
而勤一世以盡心於文字間者皆可悲也

歐陽子

### 七 醉夢習俗

○習俗之溺人如醉者之酣於酒寐者之酣於夢也  
所貴乎君子者醉而能醒寐而能覺也習俗之醉夢  
人非獨一樣富貴也凡詩文之必於工科名之必於  
得皆是也須特地猛省作急回頭始得不然醉夢了  
此一生矣 一峯子

### 八 學貴立志

○夫志氣之帥也人之命也木之根也水之源也源  
不濬則流息根不植則木枯命不續則身死志不立



則氣昏是以君子無時無處而不以立志爲事正目而視之無他見也傾耳而聽之無他聞也如猶捕鼠如雞覆卵精神心思凝聚融結而不復知有其他然後此志常立神氣清明一有私欲卽便知覺自然容住不得矣

陽明子

### 十九學貴自信

○昔有十家之隣皆荒其百畝而日惟轉糴於市取其贏餘以贍朝夕者隣家之農勸之曰爾朝夕轉糴勞費無期曷若三年耕則餘一年之食數年耕可積而富矣其二人聽之舍糴而田八家之人競相非沮



而其室人老幼亦交徧歸謫曰我朝不糴則無以爲  
饗暮不糴則無以爲殮朝夕不保安能待秋而食乎  
其一人力田不顧卒成富家其一人不得已復棄田  
而糴竟貧餒終身焉今天下之人方皆轉糴於市忽  
有舍糴而田者寧能免於非謫乎要在深信弗疑力  
田而不顧乃克有成耳

陽明子

○好遊者以爲九州之內四海之外其山川人物非  
復其鄉里所有之山川人物也竭其家以爲糧以求  
博觀於天下二三年而貧也而倦也悔而歸則其鄉  
里之山川人物卽九州四海之山川人物也噫安得



遊而悔者與之共學耶 誠齋

三十學貴精專

○山抱玉而草木潤焉川貯珠而岸不枯焉口納滋味而百節肥焉心受典誥而五性通焉故不登峻岑不知天之高不瞰深谷不知地之厚不游六藝不知智之源夫還鄉者心務見家不可以一步至也慕學者情纏典索不可以一讀能也故爲山者基於一簣之士以成千丈之峭鑿井者起於三寸之坎以就萬仞之深懸巖滴溜終能穴石規車牽索卒至斷軸水非石之鑽繩非木之鋸然而斷穴者積漸之所成也



耳形完而聽不聞者聾也目形全而視不見者盲也  
人性美而不鑒道者不學也

劉子

○弈秋通國之善弈者也當弈之思有吹笙過者乍  
而聽之則弈敗矣隸首天下之善算也有鳴鴻過者  
彎弧擬之將發未發之間問以三五則不知也奕秋  
之弈隸首之算窮微盡數非有差也然而心在笙鴻  
而弈敗算撓者是心不專一遊情外務也夫蟬之難  
取而黏之如掇卷耳易採而不盈傾筐專與不專也  
是故學者必精勤專心以入於神若心不在學而強  
諷誦雖入於耳而不諦於心譬若聲者之歌效人爲



之無以自樂雖出於口則越散矣

劉子

○一閱之市不勝異意焉一卷之書不勝異說焉一閱之市必立之平一卷之書必立之師習乎習以習非之勝是也况習是之勝非乎於戲學者審其是而已矣或曰焉知是而習之曰視日月而知衆星之蔑也仰聖人而知衆說之小也

楊子

一心無兩用

○好書者衆矣而倉頡獨傳者一也好稼者衆矣而后稷獨傳者一也好樂者衆矣而夔獨傳者一也儒作弓浮游作矢而羿精於射奚仲作車乘社作乘馬



而造父精於御自古及今未嘗有兩而能精者也

荀子

○專精純誠者合百爲於一致舛駁進退者散智慮於多端故視亭搏鼠者歌必不成而蚊蚋挫睛者射必不善吁人之一心烏可二用也

龍川子

○左手畫規則右手不能畫矩右耳辨宮則左耳不能辨商察秋毫之末者不聞雷霆之迅調絲竹之音者不見泰山之形故養由基之於射造父之於車伯樂之於馬庖丁之於牛而秋之於弈僚之於丸盧之於藥終身舉無外慕焉何者心無兩用而業有所精也

耕野子



○羿善射也而慕御則射弗若之矣伯牙善琴也而學竽則琴弗若之矣何者事不可以兩能能不可以兩精也妙明子

○天下未有無害之利也天下而有無害之利則誰不能計之者利於一必害於一越人坐於舟而行之以手燕人見而悅之歸而以手行於塗未有不匍匐顛仆而可笑者燕人而爲越人固害也越人而不爲越人豈不害哉誠齋

○人有野於宅而盜於防者其始峻其牆而正出於一門又從而衛之以兵非以制其出者也以制其入



者也夫是以盜不敢過未幾而懼夫樵牧者出入之  
艱也則鑿其東而門焉又鑿其西而門焉門多且徑  
而不能皆衛也則至於有門而不扃焉門多且徑則  
盜從其徑者而入之矣有門不扃則羣盜掉臂而入  
哉

楊廷秀

二積學遠到

○人必食熊掌而後知天下之無味士必至大學而  
後知天下之無學天地之大也而星辰麗焉日月明  
焉四時行焉引類而言之不可窮也人物之富也而  
草木蕃焉禽獸羣焉華夷分焉引類而言之不可盡



也夫古之學者殫智慮弊精神而莫究其緒靡晝夜  
極年歲而莫究其說析蠶絲擢牛毛而莫究其奧

純

一子

○積土成山風雨興焉積水成淵蛟龍生焉積善成  
德而神明自得聖心循焉故不積跬步無以至千里  
不積小流無以成江河騏驥一躍不能十步駑馬十  
駕功在不舍鍤而舍之朽木不折鍤而不舍金石可  
鏤螾無爪牙之利筋骨之彊上食埃土下飲黃泉用  
心一也蠃六跪而二螯非蛇蟺之穴無所寄托者用  
心躁也

荀子



古今名賢  
○合抱之木生於毫末九層之臺起於累土千里之行始於足下

老氏

○千金之裘非一狐之腋大厦之材非一丘之木

于

○合鎚銖則可以齊重於山陵聚一二則可以致數

於億兆

抱朴子

○子曰弗學何以行弗思何以得馬雖有逸足而不閒輿則不得爲良駿人有美質而不習道則不得爲君子

○孟子問曰堯舜文武之道可力而致乎子思曰彼人也我也稱其言履其行夜思之晝行之孳孳焉



如農之赴時商之趨利則堯舜我矣文武我矣惡有不至者乎

○顏子曰堯舜文武備道之人也六經典謨畜道之林也能範其人居其林而道卽我矣我卽道矣

○學者所以求爲君子也求而不得者有矣夫未有不求而得之者也晞驥之馬亦驥之乘也晞顏之人亦顏之徒也或曰顏徒易乎晞之則是曰昔顏常晞夫子矣正考甫常晞尹吉甫矣公子奚斯常晞正考甫矣如不欲晞則已矣如欲晞孰禦焉

楊子

廿三 得意忘言



○筌者所以在魚得魚而忘筌蹄者所以在兔得兔而忘蹄言者所以在意得意而忘言吾安得夫忘言之人而與之言哉

莊子

○先王之迹先王之芻狗也芻狗可廢也亦不可廢也聖人而廢陳迹以爲學則堯舜何必祖述文武何必憲章六經之言古人之糟粕也糟粕可棄也亦不可棄也聖人而棄前言則詩書何必刪定遺編何必三絕惟聖人學以迹達不以迹學於迹之所傳而達於迹之所不傳學以言達不以言學於言之所載而達於言之所不載

文錦



○夫拘學不假於繩尺之外淺見不及於衣帶之下  
習而不思由而不察由弓人之不能矢冶人之不能  
匠也故拘學不可以論廣淺見不可以指遠何也心  
不知其意而徒以迹固之也故以其迹則雖有若之  
同不得爲孔子以其心則雖魯人之異可以學柳下  
惠故車人不量車履人不視足通其意也故莊生視  
解牛而知養生張旭視舞劒而知草書夫解牛與養  
生相懸也舞劒與草書至遠也然視之若一伎焉意  
誠通則迹不足以蔽之也夫一者萬之所從出也故  
言一而不及萬爲有餘言萬而不及一爲不足聖人



之心一而已故無不足

陳永嘉

○丹青之巧摹寫物之形聖言之妙貫穿物之理因丹青之形而求其本真因聖言之妙而求其所以是謂象內求心非聖安能至此

薛子

○撞鈞石之鍾六樂合奏於庭所以寫樂也而憂者臨之而逾悲不主乎樂故也鬱搖而行歌促絃而急彈所以寫憂也而安恬者得之而逾歡不主於憂故也然則憂樂在外也所以主之者內也內之所感赭蒼互色東西貿區而昧者則不之知也故曰觀流水者與水俱流其目運而心遊者歟

子華子



○言飲者不可以爲醉言食者不可以爲飽人欲其醉與飽也則盍飲食之而已

陽明子

○人有生而不能飲酒者問酒之何味其能飲酒者不過告之以酒之美而已若酒之所以美者雖能飲酒者亦不能自言也非吝於告也極天下之害言酒者止於此也就使能言而不止於此亦不能使不飲者之知味何則吾以其言言酒而彼以其聽聽酒而言與聽率非酒也

誠齋

○梅止於酸鹽止於鹹飲食不可無鹽梅而其美常在醎酸之外

東坡



○善師者不陳善陳者不戰琴以不鼓爲妙棋以不著爲高

鶴林

○觀百物而後識化工之神聚衆材而後知作室之用於一事一義而欲窺聖人之用心非上智不能也

程子

○善閉者無闕楗而不可開也善結者無繩約而不可解也

老子

○優而游之使自求之厭而飫之使自趨之若江河之浸膏澤之潤渙然冰釋怡然理順

杜子

○大道無形視之不見未嘗不見大道無聲聽之不見



聞未嘗不聞所謂可見可聞非耳目所及也心見意聞而已喻之浩風入山撼木入水揚波豈得謂之無觀之不見搏之不得豈得謂之有

堂蟾子

○走之愈數而跡之愈多言之愈數而道之愈遠不若處隱而息跡忘言而體道也

妙明子

○昔者優孟學孫叔敖抵掌談笑歲餘與叔敖無辨或問之曰今人終身學孔孟何百不一如優孟答曰

心學滑稽易口耳學聖賢難

樵談

○繪雪者不能繪其清繪月者不能繪其明繪花者不能繪其馨繪泉者不能繪其聲繪人者不能繪其



情然則言語文字固不足以盡道也

王露

○六經者吾心之記籍也而六經之實則具於吾心猶之產業庫藏之實積具存於家而其記籍者特名狀數目而已世之學者不知求六經之實於吾心而徒考索於影響之間牽制於文藝之末硜硜然以爲是六經矣是猶富家之子孫不務守視享用其產業庫藏之實積而日使之遺亡散失以至爲窶人丐夫而猶囁囁然指其記籍曰斯吾產業庫藏之積也則可乎何以異於是

陽明子

以物觀物



○夫所謂觀物者非觀之以目而觀之以心也觀之以理也鑒也者不隱萬物之形水也者能平萬物之形心也者能一萬物之情所以然者謂其能反觀也所以反觀者不以我觀物也而以物觀物也既能以物觀物又安有我於其間哉是知我亦人也人亦我也我與人皆物也

邵子

○曾氏之樂不在浴沂風詠顏氏之樂不在陋巷簞瓢程氏之樂不在吟風弄月傍花隨柳

○稊稗瓦甃其中卽道天下見稊稗瓦甃而不見道聖人於稊稗瓦甃而見道舟車器械其中卽禮天下



古今名物  
見舟車器械而不見禮聖人於舟車器械而見禮  
○妙必假物而物非生妙巧必因器而器非成巧是  
以羿無弧矢不能中微其中微者非弧矢也儒無斧  
斤不能善斲其善斲者非斧斤也

十五周子愛蓮

○水陸草木之花可愛者甚蕃晉陶淵明獨愛菊自  
李唐來世人甚愛牡丹予獨愛蓮之出淤泥而不染  
濯清漣而不妖中通外直不蔓不枝香遠益清亭亭  
淨植可遠觀而不可褻玩焉予謂菊花之隱逸者也  
牡丹花之富貴者也蓮花之君子者也噫菊之愛陶



後鮮有聞蓮之愛同予者何人牡丹之愛宜乎衆矣  
濂溪子

十六養魚記

○折簷之前有隙地方四五丈直對非非堂脩竹環繞蔭映未嘗植物因洿以爲池不方不圓任其地形不甃不築全其自然縱鋪以濬之汲井以盈之湛乎汪洋晶乎清明微風而波無波若平若星若月精彩下入予偃息其上潛形於毫芒循漪沿岸渺然有江湖千里之想斯足以舒憂隘而娛窮獨也乃求魚者之罟市數十魚童子養之于其中童子以爲斗斛之



水不能廣其容蓋活其小者而棄其大者怪而問之  
且以是對嗟乎其童子無乃囂昏而無識矣乎予觀  
巨魚枯涸在旁不得其所而羣小魚游戲乎淺狹之  
間有若自足焉感之而作養魚記 歐陽永叔

廿七 盆魚說

○書齋之前有石盆池家人買魚子食猶見其煦沫  
也不忍因擇可生者得百餘養其中大者如指細者  
如箸支頤而觀之竟日嘻始舍之洋洋然魚之得其  
所也終觀之戚戚焉吾之感於中也吾讀古聖人書  
觀古聖人之政禁數罟不入汚池魚尾不盈尺不中



取市不得鬻人不得食聖人之仁養物而不傷也如是魚之於是時其有是困耶推是魚孰不可見耶魚乎魚乎細鉤密網吾不得禁之於彼炮燔咀嚼吾猶欲免爾於此吾知江海之大足使爾遂其性思置爾於彼而未得其路徒能以斗斛之水生爾之命生爾誠吾心爾得生已多萬類天地中吾心將奈何魚乎魚乎感吾心之戚戚者豈止魚而已乎

伊川子

### 八湖山賦

○放浪形骸之外俯仰宇宙之間境與心融時與意會悠然而適泰然而安物我于時乎兩忘死生惡得



而相于富貴非樂湖山爲樂湖山非樂孰若自得者  
之無愧忤掇百氏之藩籬啓六經之關鍵於焉優游  
於焉收歛靈臺洞虛一塵不染浮華盡剥真實乃見  
鼓瑟鳴琴一回一點氣蘊春風之和心遊太古之面  
其自得之樂無涯也客有擊節而歌曰屈伸榮辱自  
去來外物於我何有哉爭如一笑解其縛脫屣人間  
有真樂噫斯人也天隨子之徒歟振衣千仞崗濯足  
萬里流微斯人誰與儔

白沙子

廿九吾心真樂

○人之一心自有天下之至樂與生俱生初未嘗倚



於富貴利達之中人有反身而誠則仰不愧俯不忤  
無入而不自得焉齊貴賤於夢蝶等榮辱於蝸角寄  
一身於富貴榮辱之場一逆旅也起一心于富貴榮  
辱之外一虛舟也外物於我何有哉噫顏子之樂其  
真樂者乎夫一簞食非有膏粱之味也一瓢飲非有  
甘旨之味也在陋巷非有華屋之居也猶不改其樂  
其諸烈火中真金歟疾風中勁草歟霜雪交下而松  
柏獨有和氣歟

揚子

三十山水觀我

○嘗觀山勢高峻直截者卽生物不暢茂其合輳廻



古今名喻  
環者則生物之力厚水亦然灘石峻則水急而魚鱉  
不留淵潭深則魚鱉之屬聚焉以是而驗之人其峭  
急淺露者必無所蓄積必不能容物作事則輕易而  
寡成寬緩深沉者則所蓄必多於物無所不容作事  
則安重有力而事必成嘻觀山水者可以觀我矣

三一書法動靜

○予書法每於動中求靜放而不放留而不留此吾  
所以妙乎動也得志勿驚厄而不憂此吾所以保乎  
靜也法而不固肆而不流拙而愈巧剛而能柔形立  
而勢奔焉意定而奇溢焉以正吾心以陶吾情以調



吾性此吾所以游於藝也

白沙子

三五友序

○余居沅州之憲署以地極僻遠罕得名公卿碩士相接恒懼有過不自知知而不能改或流於小人之歸也因取凡古聖賢書列之後堂公退則俯而觀仰而思往復熟誦以求其義或言行有未當則質之書以去其非而趨於是視書蓋若嚴師而不敢慢焉堂下有方池池側有竹梅蘭菊四種池中有荷蓮數百本合爲五物列植上下更秀迭茂予每讀書覺倦則步廣庭臨清池顧諸花木而樂之旣而自謂曰古之



君子未有不資師友以成其德者今余亦既取古聖  
賢書以爲師矣獨未得夫良友以自輔焉念彼五物  
者皆稟天地之氣以生乃植物之君子也苟取其德  
以自輔豈非僻遠中之一助歟故予之心或曲而未  
直塞而未通也則友竹之勁直中虛以端其曲而開  
其塞焉余之德或雜而未純同而諧俗也則友梅之  
清白絕俗以滌其垢而厲其介焉以至友荷蓮之中  
立以端余志友蘭菊之芬芳以潔余行是皆五物之  
有益於余者也若夫友竹之操可以閱歲寒友梅之  
味可以調鼎實友荷蓮之娟秀不妖可以發文藻友



蘭菊之風致高閒可以安雅澹又皆五物之有益於  
余者焉或者疑曰人之取友賴其忠告之益耳彼五  
物雖有是美而寔則無知子或有以取安能有以勵  
子乎余曰不然孔子曰智者樂水仁者樂山山水亦  
豈有知而能勵于人乎哉特取其動靜之性默有契  
于仁智耳余與此五物者儼然相對因彼識此方將  
去喋喋多言之煩希心領神會之妙兼取博采其德  
約而總之於心以輔余之不及又豈待發於聲見於  
詞而后喻耶疑者乃解而求與五物者序因拱揖結  
爲良友而求正於書又爲五詩以固其交云

文清



三三邃菴解

○邃菴主人通藉禁廬僑居京第隙地晨掃重扉晝  
閉客有過門者叩門而問曰此非楊子之居乎童子  
對曰是也導客而入若引若曳複院繚垣巍堂巨櫺  
客乃縮足脫屨探懷出刺將脩容以爲禮且歷階而  
就次童子曰未也再導而前委蛇隱翳突霤中啓懸  
櫳外蔽客乃彷彿指擬逡巡睥睨耳側聽而無聞步  
將舒而復跋童子曰未也盡歷紆曲豁達蒙瞶仄徑  
旁通層軒倒綴斐几庭設牙籤駕度主人方兀坐書  
堆凝神注思聆謦欬而偶起具冠裳而出俟客乃揖



而請曰子何居之邃也主人曰從善寔難從惡則易  
地有所宜擇俗有所宜辟吾將寄遠心於車馬託大  
隱於城市屏物誘於紛華去塵襟於板楔胡深造以  
獨得匪超舉而長逝客曰如斯而已乎主人曰六籍  
絲棼諸家鼎沸衆難交錯羣疑積滯吾將辯亥豕於  
偏旁註蠱魚於䟽記思縷析而毫分度窮搜而絕繼  
豈塊處而無營亦嬰心於有事客曰如斯而已乎主  
人曰理窟淵微天機奧秘尼叟之所罕言庖犧之不  
盡意吾將高仰堅鑽深鉤遠致求四情於未發之時  
探五性於有生之際繇粗而益極其精舉大而不遺



其細尋墜緒於虞唐沂長源於洙泗窺數仞之宮墻  
涉千尋之涯涘會萬變以同歸或殊途而一揆顧茲  
菴之攸寄若百工之在肆彼居安以資深亦引伸而  
觸類者也客起再拜領邃之義識道理之鄉方得工  
夫之次第若馳康莊請執君轡若游大川請鼓君柁  
隨君所之無畫無廢鉅卷長辭高楣大字晞唐學解  
擬漢賓戲匪菴則名敢告同志

西涯李氏

三  
藻軒

○青華主人建閼南輿高居江渺構材爲亭甃石爲  
沼層瀾碧皺衆卉雲繞擷芳漱潔名之曰藻客有過



者難之曰萬景藂茁羣植並分鉅者爲梗櫟秀者爲  
篁筠堅者爲檜栢苓者爲蘭蓀山苞水葩莫可具陳  
彼藻之細何足以云主人曰君子設佩聖人取物匪  
名則嘉惟義斯擇品不必富類不必僻泥形爲迂執  
象爲惑子坐聽我言藻之德夫藻者氣孕天秀根含  
地靈內秉柔質外敷素英不雕而華匪醅其馨順時  
生者爲孫命與物爲徒者爲和光寧負潔以自濯亦  
何心於行藏客曰可得聞邪主人曰窮海之裔荒溪  
之涯舟楫之所不至人跡之所不加以汗漫爲方以  
波濤爲家惟溷跡於草莽寧委情於泥沙客曰微哉



善藏其用子旣出矣請言乎動主人曰或載衣襟或  
登筐篚滌以甘泉薦以方簋陋末跡於芻蕘耻遺瑕  
於葑菲繪形則與火齊明比德則與鑒爲軌功雖著  
而不知其勞用非儉而莫闕其美客曰噫哉君子之  
斐主人曰嘻物貴寔用禮戒彌文弗玩其華而采其  
根楚佩江蘼周歌澗繁桃李蔽蔭惟葛與蘋芡瓜行  
葦列國所陳繁藻之德於吾則均朝爾吾居夕吾爾  
羣匪藻吾軒亦藻吾身下雪民隱上華國勲惟夙夜  
是存以無負於吾軒客起再拜歛容棘吻君門巍巍  
矇者莫瞬君行濯濯瑕莫可据包荒納污辭我不損



鄙人何知敢謝不敏主人不答莞爾而哂

西涯子

三五拙齋賦

○夫聖賢之道大公而至正無巧亦無拙也自王化  
陵夷民俗滋僞乃以君子之循理安分者爲拙小人  
之機變倖得者爲巧是故君子視圭笏爲柴柵而巧  
於干進者以爲拙視名譽爲韁鎖而巧於取名者以  
爲拙視金玉爲沙礫而巧於冒利者以爲拙當舍生  
取義則視死如歸而巧於偷生者以爲拙是果真拙  
者哉吾聞之拙於人者巧於天拙於今者巧於古曾  
參之魯顏氏之愚孟子之不遇似拙矣而巧於爲聖



古今名  
人之徒儀秦之辨鞅斯之智若巧矣而拙於謀其身  
噫安得天下之人皆舍巧而趨拙哉一峯子

古今名喻卷之七



古今名喻卷之八

宛陵野史文臺吳仕期德望甫編輯

一 稻粱醖毒

○曰子知稻粱之足以飫乎曰知之曰子知夫醖毒之足以斃乎曰知之曰子知稻粱之美也則必食之乎曰然曰子知醖毒之害也則必避之乎曰然曰若是則可謂能致其知矣曰子亦知夫仁義之爲稻粱利欲之爲醖毒矣乎曰知之曰子之於仁義能如稻粱而時食之乎曰好焉而未能恒也曰子之於利欲能如醖毒望而避之乎曰惡焉而未能去也曰若是



古今名  
則未能致其知矣夫知稻粱而朝夕食之者是自厚  
其生者也知酖毒而不之避又從而食之者是自蹙  
其生者也子其擇之而已 東郭

二 布衣粟食

○布可以溫故人取之以加其身粟可以飽故人取  
之以實其腹今有人焉布而不衣粟而不食則雖積  
布粟如丘山亦不免於凍餒而已矣夫布與粟如丘  
山而不免於凍餒者非富之罪也富而不用富之罪  
也然則人之有道而不用者何異哉 純一子

三 厚積薄發



○盍嘗觀于富人之稼乎其田美而多其食足而有餘其田美而多則可以更休而地力得完其食足而有餘則種之常不後時而歛之常及其熟故富人之稼常美少秕而多實久藏而不腐今五十口之家而共百畝之田寸寸而取之日夜以望之鋤耨銍艾相尋於其上者如魚鱗而地力竭矣種之常不及時而歛之常不待其熟此豈復有美稼哉古之人其才非有以大過今之人也其平居所以自養而不敢輕用以待其成者閔閔焉如嬰兒之望長也弱者養之以至于剛虛者養之以至於充三十而後仕五十而後



爵信於久屈之中而用於至足之後流於既溢之餘而發於持滿之末此古之人所以大過人而今之君子所以不及也吾少也有志於學不幸而早得與吾子同年吾子之得亦不可爲不早也吾今雖欲自以爲不足而衆且妄推之矣嗚呼吾子其去此而務學也哉博觀而約取厚積而薄發吾告子止於此矣子歸去京師而問焉有曰轍子由者吾弟也其亦以是語之

東坡

情因見遷

○望山者其高蒼蒼望海者其遠茫茫振屨而升蒼



蒼愈高鼓棹而往茫茫愈遠然後知向之所覩未盡也

箕山子

○澗谷之水深不過咫尺丘垤之山高不過尋丈人則狎而玩之及至登太山之懸崖窺巨海之驚瀾莫不震恐掉慄眩惑而自失何者所觀變於前則所守易於內也

○不窺瓊林之庫孰知扁舟之老叟未爲富不遊上林之苑誰知金谷之花竹未爲繁

○至至焉見次焉平地而觀天以爲山之端卽天也至乎山之端而後見有山而無天聞京邑之麗者謂



古今名賢  
與里之市無異也至京邑而後見其異耳

俱文贈

### 五 眇不識日

○生而眇者不識日問之有目者或告之曰日之狀如銅槃扣槃而得其聲他日聞鍾以爲日也或告之曰日之光如燭捫燭而得其形他日揣籥以爲日也日之與鍾籥亦遠矣而眇者不知其異以其未嘗見而求之人也道之難見也甚於日而人之未達也無以異於眇達者告之雖有巧譬善導亦無以過於槃與燭也自槃而之鍾自燭而之籥轉而相之豈有既乎故世之言道者或卽其所見而名之或莫之見而



意之皆求道之過也 東坡

### 六人自不察

○身與道一也一而二者不察之過也二而一者察之功也匹夫有壁而藏於家既久而偶忘之不勝其困而假丐於鄰自以爲天下之至貧也人亦不知其富也忽憶其壁出而鬻之一朝而獲千金夫千金非自外至也匹夫之所自有也有千金而困於貧既貧而富則察與不察也當其不察壁亦不亡及其既察壁固在也道也者吾身之壁也學者有壁而弗察弗察而亡者也 誠齋



七 水流至海

○夫所謂繼之者善也猶水流而就下也皆水也有  
流而至海終無所濁此何煩人力之爲也有流而未  
遠固已漸濁有出而甚遠方有所濁有濁之多者有  
濁之少者清濁雖不同然不可以濁者不爲水也如  
此則人不可不加澄治之功故用力敏勇則疾清用  
力緩怠則遲清及其清也則却只是元初水也明道子  
○萬物各受此理如衆水各受此日光但物之清者  
受此理理則益明物之昏者受此理則理亦昏昏非理  
昏也由物之昏蔽之也如水之清者受此日光則光



亦明水之濁者受此日光則光亦暗暗非光暗也水之濁以淆之也以是觀之則性本善而無惡可知其惡者皆氣質之拘也

文清公

### 八談虎色變

○真知與常知異嘗見一田夫曾被虎傷有人說虎傷人衆莫不驚獨田夫色動異於衆若虎傷人莫不知之然未嘗真知真知須如田夫乃是故人知不善而猶爲不善是亦未嘗真知若真知決不爲矣

明道

### 九騎驢覓驢

○知得如此是病即便不如此是藥若更問何由得



古今名賢  
如此則是騎驢覓驢只是一場閒說話矣  
晦菴

十人貴真知

○知玉之爲寶則人不能以石亂之矣知醴之爲甘則人不能以蘗亂之矣知聖人之爲大中至正則異氏不能以說惑之矣  
程子

○夫鼎鑊陷穽之不可蹈人皆知之也世之人未有蹈乎是者以其知之審故也致身下流天下之惡皆歸焉固無異於鼎鑊陷穽也而士或蹈之而莫之避以其未嘗真知故也使其真知爲不善如蹈鼎鑊陷穽則人孰肯有爲不善者耶  
楊龜山



○臧紇自以爲聖白圭自以爲禹長卿自以爲相如  
楊雄自以爲孟軻崔浩自以爲子房噫千百世而下  
孰有許之者乎夫數子不自知而人知之人知數子  
而又不自知可慨也已明堂寢室匠梓之能爲也而  
自處反無廬乘馬玉輅輪輿之能爲也而自出反無  
車何者工於理人而拙於自理也見秋毫之末者不  
能自見其睫舉千鈞之重者不能自舉其身何者知  
人則易而知己則難也是故自知者莫先於知人而  
知人者莫貴於自知

延陵子

十一 厲人自知



○厲之人夜半生其子遽取火而視之汲汲然惟恐其似已也惡人生子恐其似已是自知其惡也彼且自知而世之惑者皆不自知則不如厲人矣

莊子

十二 太虛同體

○此心廓然與太虛同體太虛之中何物不有而無一物能爲太虛之障礙乎凡富貴貧賤得喪愛憎之相值卽飄風浮靄之往來變化於太虛而太虛之體固嘗廓然其無碍也

陽明子

○聖人之心本備萬物而無一物夫惟無物乃能見物金納於火火百煉而金自若月印於水水百折而



月自若聖人之靜非不與物接者爲可貴而其交物而不蔽於物者斯爲可貴也是故心一也聖人所以異乎人者靜不靜之間耳歟流而轉見人若非人席地而舞見室若非室聲一也躁動者不聞而安居者聞之非耳目之變也亦靜不靜之間也易曰復其見天地之心蓋天下之理固有聰耳而聽者無聞而反耳之聽者徐以神聽則唯然之中有雷霆拭目而視者無覩而反目之視者徐以神視則介然之中有嵩華大抵逐於物者蔽於物而虛其中者斯足以燭物也

陳子



十三羅浮葑屋

○暘谷始旦萬物畢見而居於葑屋之下者亭午不知也忽然後夜半起振衣於四千丈羅浮之岡引盼於扶木之區赤光在海底皦如晝日仰見羣星不知其爲夜半此無他有蔽則闇無蔽則明況人易於蔽者乎知其蔽而去之羅浮之於扶木也溺於蔽而不勝葑屋之於亭午也二者之機間不容髮在乎思不思畏不畏之間爾

白沙子

十四主心常存

○一日子而亥一歲春而冬一生少而老操存此心



如過獨木橋如御逸馬如俯懸崖如見大賓而對上帝使主心常存客氣聽命則病根自除而病証不形方爲第一流也若徒制其外而不從事於內譬操萬斛之舟於長江大河遇狂颶巨浪舍柁而惟蒿櫓是仗焉吾見其危矣

一峯子

○於其善心之萌也若食者之求飽也若抱赤子而履春冰惟恐其或陷也若捧萬金之璧而臨千仞之崖惟恐其或墜也于其不善之萌也若鴆毒之投於羹也若虎蛇之橫集而思所以避之也若盜賊之橫侵而思所以勝之也

陽明子



十五握之有要

○一圍之木而持千鈞之屋五寸之鍵而制闔闢之機豈其材足以勝任哉所握要也

○轉萬斛之舟者由一尋之木發千鈞之弩者由一寸之機

譚子

○舉網以綱衆目皆張振裘持領萬毛皆整

桓子

○道有樞言有會施移則舟轉輪運則車行

呂子

○閉門造車出門合軌

○剖石者乘其隙開鑰者透其簧

彙錄

○塞水不塞其源者終必復流伐木不伐其本者終



必復生

○今夫富人必居四通五達之都使其材布出於天下然後可以收天下之利有小丈夫者得一金櫝而藏諸家拒戶而守之嗚呼是求不失也非求富也大盜至刼而取之又焉知其果不失也

蘇子

○學所以益才也礪所以致刃也吾嘗幽處而深思不若學之速吾嘗跂而望矣不若登高之博見故順風而呼聲不加疾而聞者衆登丘而招臂不加長而見者遠故魚乘於水鳥乘於風草木乘於時

謝苑

○大陽當空羣陰盡伏一蔽旣徹羣疑皆亡

陸子



○雷電風雨參錯交動於下而太虛之本體自若萬事萬變紛紜膠擾於外而吾心之本體自若

薛文清

十六心統五官

○問心要逐物如何則可曰人君端拱清穆六卿分職天下乃治心統五官亦要如此今眼要視時心便逐在色上耳要聽時心便逐在聲上如人君要選官時便自去坐在吏部要調軍時便自去坐在兵部如此豈惟失却君體六卿亦皆不得其職

陽明子

十七病瘡不發

○天理何以謂之中曰無所偏倚曰是何等氣像曰



如明鏡然全體瑩徹畧無纖毫染著曰偏倚是有所  
染著如著在好色好利好名等項上方見得偏倚若  
未發時美色名利皆未相著何以便知其有所偏倚  
曰雖未相著然平日好色好利好名之心原未嘗無  
既未嘗無卽謂之有既謂之有則亦不可謂無偏倚  
譬之病瘡之人雖有時不發而病根原不曾除則亦  
不得謂之無病之人矣須是平日好色好利好名等  
項一應私心掃除蕩滌無復纖毫留滯而此心全體  
廓然純是天理方可謂之喜怒哀樂未發之中方是  
天下之大本



大規矩尺度

○良知之於節目時變猶規矩尺度之於方圓長短也節目時變之不可預定猶方圓長短之不可勝窮也故規矩誠立則不可欺以方圓而天下之方圓不可勝用矣尺度誠陳則不可欺以長短而天下之長短不可勝用矣良知誠致則不可欺以節目時變而天下之節目時變不可勝應矣毫釐千里之謬不於吾心一念之微而察之亦將何所用其學乎是不以規矩而欲定天下之方圓不以尺度而欲盡天下之長短吾見其乖張謬戾日勞而無成也已



十九生意不窮

○與其爲數頃無源之塘水不若爲數尺有源之井  
水生意不窮

陽明子

二十大鵬圖南

○人生精神命脉元是俱足但入聞仁義出見紛華  
東奔西鶩疲精竭神而兩無所就譬如兩頭蛇未得  
須臾寧靜而畢竟不能千里須是專心致志無以小  
害大無以賤害貴若大鵬之圖南息以六月而扶搖  
萬里其孰能禦之

東郭子

二十一景星喬嶽



古今名略  
○問邑之貴則數高位以對問邑之富則數積財以對問邑之人物則數修德厲行濟世範俗以對而貴富弗齒或以病焉故肆志一時者爲軒鶴爲牢豕尚友千古者爲景星爲喬嶽

東郭

廿二心脉心數

○敖器之善察脉嘗言心脉要細緊洪備此三者大貴大賢也羅鶴林曰小心翼翼細也遜志時敏緊也有容乃大洪也

○有日者謁黃直卿云善筭星數知人禍福直卿曰吾亦有個大筭數書曰惠迪吉從逆凶作善降之百



祥作不善降之百殃傳曰言悖而出者亦悖而入貨  
悖而入者亦悖而出此筭亘古今不差豈不優於子  
之筭乎

鶴林王露

### 十二隨病立方

○見人生厭心無人生快活心總是心隨境轉不是  
境隨心轉也事上磨礱此是格物譬之服藥此是正  
方如生近日盡去多務又是隨病立方譬之飲食隨  
物可以養生若身有疾便素食亦是養生若傷食便  
減食亦是養生故精神如常卽應酬是格物精神當  
養卽小事是格物

念菴子



廿三賣珠買櫝

○楚人有賣其珠於鄭者爲木蘭之櫃薰椒桂之櫝綬以珠玉飾以玫瑰輯以翡翠鄭人買其櫝而還其珠此可謂善買櫝矣非可謂善鬻珠也

韓非子

廿四學步邯鄲

○昔有學步於邯鄲者曾未得其彷彿復失其故步

遂匍匐而歸

班氏傳

廿五正路與斜徑不同

○聖人之道猶坦途諸子之道猶斜徑坦途無不之也斜徑亦無不之也然適坦途者有津梁適斜徑者



苦荊棘鹿門子

廿六自然奇怪

○今之工文或先於奇怪者顧其文工與否耳夫意新則異於常異於常則怪矣詞高則出於衆出於衆則奇矣虎豹之文不得不炳於犬羊鸞鳳之音不得不鏘於烏鵲金玉之光不得不炫於瓦石非有意於先之也廼自然也必崔巍然後爲嶽必滔天然後爲海明堂之棟必撓雲霓驪龍之珠必固深泉足下以少年氣盛固當以出拔於意學文之初且未自盡其才何遽稱力不能哉又曰近風教偷薄進士尤甚廼



古今名賢  
至有一謙三十年之說爭爲虛張以相高自讀詩未  
有劉長卿一句已呼阮籍爲老病矣筆語未有駱賓  
王一字已罵宋玉爲罪人矣書字未識偏旁高談穠  
讀書未知句度下視服鄭所當嫉者生美才勿似之

廿七怪松圖讚

○有道人自天台來示余怪松圖披之甚駭人目根  
盤于巖穴之內輪囷偃側而上身大數圍而高不四  
五尺礪礪然蹙縮然榦不暇枝枝不暇葉有若龍拏  
虎跛壯士囚縛之狀道人曰是何奇怪之如是乎余  
曰草木之生安有怪耶苟肥瘠得於中寒暑均於外



不爲物所凌折未有不挺而茂者也况松柏乎今不幸出於巖穴之內雖正性不辱而力與石鬪卒不勝其壓擁勇鬱遏全憤激訐然後大醜彰於形質天下爭謂之怪木吁豈異人乎哉天之賦才之盛者蚤不得用於世則伏而不舒薰蒸沉酣日進其道摧擠勢奪卒不勝其阨喘呼歎孳發越赴訢然後大奇出於文彩天下指之爲怪民嗚呼木病而後怪不怪不能圖其真人病而後奇不奇不能駭於俗非始不幸而終幸者耶道人曰然爲我譏之讚曰  
松生陰隘巖獄穴械病乎不快卒以爲怪擁腫支離



古今名論  
神羞鬼疑道人咨嗟筆傳其奇或怪於形或奇于辭  
吾爲怪魁是以讚之

陸龜蒙

### 廿八蠹魚篇

○蠹書魚曰吾常游於文字間文字有所殘缺者人則曰吾蠹之故曰予曰蠹書魚夫書吾豈蠹之耶昔者孔子修春秋帝王之道取三代之政述而爲經則謂之書其文要而簡其道正而一所以扶世而佑民亦萬世常行不易之道也後世人有悖之者則其書息其書息則聖人之道隳壞也斯得不謂之蠹乎文中子曰九師興而易道微三傳作而春秋散齊韓毛



鄭詩之末也大戴小戴禮之衰也又楊墨之言出而孔子之道塞佛老之教行而堯舜之道潛斯則易其九師之蠹乎春秋其三傳之蠹乎詩其齊韓毛鄭之蠹乎禮其大戴小戴之蠹乎孔子道其楊墨之蠹乎堯舜道其佛老之蠹乎魏以降迄于今又有聲律對偶之言雕鏤文理剗刻經典浮華詞宗巧偽相銜剗削聖人之道離析六經之旨聖人之道日以刻薄而不脩六經之旨日以解散而不合斯文其蠹也書之蠹有自來矣而謂予曰蠹書魚予敢辭

楊大年

廿九蠹化篇



○橘之蠹大如小指首負特角身蹙蹙然類蝨蟻而青翳葉柳齧飢蠹之速不相上下人或振觸之輒奮角而怒氣色桀驁一旦視之凝然弗食弗世明日復往則蛇爲蝴蝶矣力力拘拘其翎未舒檐黑韞倉分朱間貢庚璵而脩綏纖且長久醉方悟羸枝不揚又明日往則倚薄風露攀緣草樹聳空翅輕瞥然而去或隱蕙隙或留篁端翩旋軒虛颺曳紛排其可愛也須臾犯螫網而膠之引絲環纏牢今攀枯人雖甚憐不可解而縱矣噫秀其外類有文也默其聲類有德也不朋而遊類潔也無嗜而食類廉也向使前不知



爲橘之蠹後不見觸蝥之網人謂之鈞天帝居而來  
今復遇矣天下大橘也名位大羽化也封畧大蕙簞  
也苟滅德忘公崇浮飭傲榮其外而枯其內害其本  
而窒其源得不爲大蝥網而膠之乎觀吾之蠹化者  
可以惕之

陸龜蒙

### 三十投壺篇

○傳曰張而不弛文武不能也弛而不張文武弗爲  
也一弛一張文武之道也君子學道從政勤勞罷倦  
必從容宴息以養志游神故可久也蕩而無度將以  
自敗故聖人制禮以爲之節因以合朋交之和飾賓



主之懽且寓其教焉夫投壺細事游戲之類而聖人取之以爲禮用諸鄉黨用諸邦國其故何哉鄭康成曰投壺射之細也古者君子射以觀德爲其心平體正端壹審固然後能中故也蓋投壺亦猶是矣夫審度於此而取中於彼仁道存焉疑思則疎惰慢則失義方象焉左右前卻過分則差中庸著焉得一失二成功盡棄誠慎剛焉是故投壺可以治心可以修身可以爲國可以觀人何以言之夫投壺者不使之過亦不使之不及所以爲中也不使之偏頗流散所以爲正也中正道之根柢也聖人作禮樂修刑政主教



化垂典謨凡所施爲不啻萬端要在納民心於中正而已然難得而制者人之心也自非大賢守道敦固則放蕩傾移無所不至求諸少選且不可得故聖人廣爲之術以救之投壺與其一焉觀夫臨壺荷矢之際性無粗密莫不聳然恭謹志存中正雖不能者可以習焉豈非治心之道歟一矢之失猶一行之虧也豈非修身之道歟兢兢業業慎終如始豈非爲國之道歟君子之爲之也確然不動其心儼然不改其容未得之而不懾旣得之而不驕小人之爲之也俯身伸臂挾巧取奇苟得而無媿豈非觀人之道歟由是



言之聖人取以爲禮宜矣彼博奕者以詭譎相高以殘賊相勝孔子猶曰飽食終日無所用心爲之猶賢乎已况投壺者又可鄙畧而輕廢哉古者壺矢之制揖讓之容今雖闕焉然其遺風餘象猶可彷彿也世傳投壺格圖皆以奇雋難得者爲右是亦投瓊探闔之類爾非古禮之本意也余今更定新格增損舊圖以精密者爲右偶中者爲下使夫用機僥倖者無所措手焉

司馬君實

三二檯星門記

○此聖人之門也上帝命之聖人立之天下古今之



人由之以太極爲棟樑以陰陽爲闔闢以五行爲往來以六合爲垣宇以誠爲根以敬爲鑰以禮爲闔以勇爲衛以知爲先容入此門也然後爲大成其行天下之大道其立天下之正位其居天下之廣居升其堂其廣無外入其室其密無內天下之高年皆吾家之老也天下之孤弱皆吾家之幼也天下之顛連無告者皆吾家之兄若弟也天下之昆蟲草木動植百物皆吾家之黨與也伏羲神農黃帝堯舜文武周公孔子之法載之六經者皆吾家之所以爲教也其教之成也根於心晬於面盎於背施於四體而達于吾



家父安其慈子安其孝君安其仁臣安其敬長幼安其敘朋友安其信男安于外女安于內士安于學農安于耕商賈安于懋遷行旅安于役天地萬物無不各安其所此吾家之教化也庭草壇杏紅翠交映天鵲淵魚飛躍上下光風霽月灑落無邊此吾家之景象也趙孟之貴韓魏之富視之如浮雲然至吾家者必得其門而入顏子入之而歎其高堅曾子入之而美其富潤子思孟子入之而極其高明廣大故曰堂高數仞榱題數尺我得志弗爲也其所見者大也自是以來漢儒以訓詁爲門魏晉齊梁以老佛之虛無



寂滅爲門唐儒以文詞爲門昌黎韓愈欲入其門而不以其道乃伏於光範門外識者羞之孟氏而後入其門者宋之諸子可數矣或吟弄其光霽或品題其風月或洞闢其堂奧或塗墜其垣墉元吳草廬氏欲躡數子之蹤將杖叩門而跛蹇生焉於戲得其門者或寡矣

一峯子

### 三三重修儒學記

○夫立之師傅區其齋廟昭其儀物具其廩庖是有國者之立學也而非士之立學也緝其敝壞新其圯墁給其匱乏警其怠弛是有司者之脩學也而非士



之脩學也士之學也以學爲聖賢聖賢之學心學也  
道德以爲之地忠信以爲之基仁以爲宅義以爲路  
禮以爲門廉耻以爲垣墻六經以爲戶牖四子以爲  
階梯求之於心而無假于雕飾也其功不亦簡乎措  
之於外而無所不該也其用不亦大乎三代之學皆  
此矣我國家雖以科目取士而立學之意亦豈能與  
三代異學之弗立有國者之缺也弗脩焉有司之責  
也立矣脩矣而居其地者弗立弗脩是師之咎士之  
耻也二公之脩學既盡有司之寄矣多師多士無亦  
相與自脩其學以遠于咎耶者乎無亦擴乃地厚乃



基安乃宅闢乃門戶固乃垣墻學成而用大之可以  
庇天下次之則以庇一省一郡小之則以庇其鄉閭  
家族庶以無負於國家立學之意有司脩學之心哉  
若乃曠安宅舍正路圯基壞垣倚聖賢之門戶以爲  
姦是校之爲萃淵藪也則是朝廷立之而爲士者傾  
之有司脩之而爲士者毀之亦獨何心哉陽明子

三三釣臺亭碑

○李子遊於白鹿之洞顧山歷澗谷嶺合杳石灘茂  
林適抄秋之交風行瑟瑟颯颯回視五老峯垂在几  
榻於是灑然而樂也曰嘉哉山矣乃與諸生泝澗蹇



蘿履石而上別薛考刻步自院門西百步有石突如危如仰而睇之劉曰釣臺俯之渟泓魚躍諸生曰此往者釣魚處也李子曰吁佳哉乃命卽其上亭焉亭成李子遊于其上諸生從李子俯仰良久喟然嘆曰夫予今乃知釣可以喻學也諸生曰夫釣與學同乎李子曰夫釣者飭竿絲綴芳餌兀坐磐石之上凝精歛志沾沾而聽睇睇而視期取必獲蓋饑需之餽而渴俟之醑也乃竟日而不得一魚神荒氣沮投竿踣踣而歸路詠溪歌天日向暮諸生以爲苦邪樂邪衆皆蹙額弗懌曰苦矣李子曰假令以四海爲壑明月



爲鉤以虹霓爲絲以崑崙爲盤石凌雲駕鴻超出天  
地倒視日月釣無不獲朝醢巨鼈暮饌脩鯨則汝願  
之乎衆皆掀眉而喜曰願哉然無能焉李子曰夫釣  
以魚學以道故据盤石兀坐竟日期取而必獲者計  
功者也假天地以爲釣垂涎于不可必得者驚遠者  
也計功者泥驚遠者虛夫泥與虛不可以得魚而况  
于學乎是故君子以仁義爲竿以彝倫爲絲以六藝  
爲餌以廣居正位爲盤石以道德爲淵以堯舜禹湯  
周孔相傳心法爲魚日涵而月泳之至而後取不躐  
其等不計不必積久而通小大必獲夫然後道可致



古今名賢  
也是以君子身處一室而神遊天地矣夫然後以盤  
石爲崑崙丈絲爲霓寸鉤爲月溪壑爲四海鰕鮓爲  
鼈鯨此所謂一貫之道也故曰釣可以喻學諸生乃  
歛色平心再拜而謝曰聞教矣書于石爲記

李夢陽

### 三四養素齋記

○金華俞君大有敦愿而有禮好古而能文文聲動  
縉紳間雅不喜自耀深居退處若能遺世者所居之  
齋題曰養素凡其所爲文亦以養素加之其言曰世  
道之降也我知之矣雕鏤刻楠丹漆黝堊文憲綺疏  
錦幃繡幄者居室之華也于我乎何加我則土壁而



茅簷繩樞而甕牖匡牀席門僅容俯仰以養吾素而  
已狐袖豹褙烹肥膾腴青紅奪目甘腴淪膚者服食  
之侈也于我乎何與我則被褐而束韋飯糗而茹藜  
粗糲淡泊僅禦饑寒以養吾素而已脅肩累足拱手  
屈膝屏氣卑聲傾欹詭仄者禮之繁也我則不能惟  
知率情任質直躬正色無求于人不忤於物以養吾  
素而已剽雋掠奇粉句飾辭彩雜章施爲祿之資者  
辭文之麗也我則不爲言務達志文以適意不求世  
知惟理之務以養吾素而已凡是皆素乎外者開闢  
之初是謂太素風淳氣厚少智寡慮其民師師其俗



熙熙故易爲治而善人多也今者巧出僞作風澆氣  
薄嬰兒設機穽女婦事游譚賤胥握文供富室擅筆  
朴訟獄煩滋世道交削然無位于時且弗敢議也天  
之眚命旣虛且靈寂然湛然不撓不撓故能酬應萬  
化洞察羣情主敬立誠與道合併以其體素也今也  
聲色以汨之利欲以汚之羞愧以鉢之浮詐以塗之  
闇昧錯穢敗厥良彝此予之所大懼而不敢不養也  
彼恃其華我以爲陋彼快其侈我安吾約彼逞其煩  
我執吾簡彼眩其麗我守吾白去僞存真以全吾之  
天而反道之樸庶幾乎立兩間而無一愧怍也乎同



羣偉其言高其志避席唯唯書以爲記

方遜志

三五冷菴記

○陳君粹之名其退省之廬曰冷菴或問于一峰居士曰天地間一元氣而已舒而燠爲春夏歛而冷爲秋冬燠可愛冷可畏曷不爲其可愛爲其可畏者乎昔廣文先生座客無氈沽酒無錢人號曰冷官今居有高堂出有輿馬前旌旄而後旌節異乎昔之冷者矣無冷之實而盜冷之名于義何居夫子知粹之者其有說乎居士曰是非爾所知也夫冷者天地之義氣也人心之靈義肅之則冰欲然之則火目然乎色



耳然乎聲口然乎味四肢然乎安佚顛宜欲海焦爛  
名塗皆內熱之所致也于是沃以泗源之水清以程  
門之雪使百慮灰冷萬境俱寂湛然冰壺皓然秋月  
此冷之體也暑路炎荒霜飛雪積玄厓陰壑虎伏蛇  
藏海汜河凝山摧岳什見者膽慄聞者毛豎憂者喜  
病者愈什者起咨怨者謳吟此冷之用也雖然無冬  
不成春無貞不生元安知可畏者不爲可愛乎勞尊  
能謙素履無咎又安知熱者不爲冷乎事固有倒行  
而逆施者此吾粹之所以爲冷也乃歌曰衆欲熾如  
冷斯寂矣萬民焚如冷斯濯矣百官冷大化行天下



樂矣冷菴聞曰居士知我者解我固當請書于菴壁  
用顧諟嗣命一峯子

三六常春園記

○外父雲巖翁與其弟與言與莊爲堂于南園曰常  
春命子婿羅倫記之倫適與客過其堂焉方嚴冬也  
風威發而氣栗烈氷柱挂簷雪花如手坐良久足麻  
木齒牙下上指僵袖外不得屈伸客笑曰今日之春  
何在乎常宜如何也夫天地之化燠而爲春熱而爲  
夏涼而爲秋寒而爲冬方其至也推之而不可拒及  
其去也執之而不可留雨生於雲水生於山雲與山



不得而有也春生於天天且不得而有之而人欲有之以爲常不亦惑與倫曰是非客所知也夫春在天爲元在人爲仁仁固春之爲也邵子曰收天下春歸之肺腑是春形於身則晬面盎背形於家則父子慈孝兄弟友讓夫婦唱隨卽其人入其室如在春風中矣皋夔稷契得之爲唐虞之春伊傅周召得之爲三代之春孔子得之爲萬世之春當時弟子得之浴沂詠歸亦爲聖人之所與自是千有餘歲周子春於濂溪明道春於河南夫是春也得於天而有於我是固所以爲常也翁兄弟垂白嬉怡羣從朝夕奉觴和顏



是亦所以爲常歟翁老矣翁之子孫收是春於身未  
用春於家用則春天下進進乎周程皋夔之域而後  
可以爲常也一峯子

三六竹鶴軒記

○盤谷居士有竹鶴癖所至種竹與居携鶴以遊客  
過之曰子何癖乎昔衛懿公好鶴鶴有乘軒者卒亡  
其國子猷好竹至呼之爲君而子猷不成于晉子何  
癖乎居士曰凡物好之而不忘則癖仁者樂山忘其  
山也知者樂水忘其水也若人之見也樵者亦樂山  
漁者亦樂水乎目癖乎色不忘乎色也耳癖乎聲不



忘乎聲也癖乎富貴不忘乎富貴者也堯舜桀紂皆有天下也堯舜有天下而不與焉忘天下者也桀紂有天下至於亡其身堯舜忘也桀紂癖也懿公之亡桀紂之癖也鶴能亡其國乎凡物好之而不忘則癖忘則神熒河之圖伏羲忘其爲馬洛中之書神禹忘其爲龜茂叔忘於蓮伊川忘於梅陶淵明忘於菊張旭之爲書也忘其爲書而後神也好事者種菊一籬植蓮一池號於人曰吾愛菊也愛蓮也猶童子執筆而爲旭之書號於人曰吾旭也其能旭乎子猷之於竹也好之亦若是與是故天之生物也忘其生也物



之生之忘其所以爲生也今夫鶴俛而飲仰而啄招  
之而來放之而去忘其鶴也今夫竹貫四時而不改  
上雲霄而不撓虛中而直外毋矜色毋傲態忘其竹  
也吾以一老頽乎二物之間方其境與神會心與物  
冥天地吾不知其大日月吾不知其明鬼神吾不知  
其幽千駟萬鍾吾不知其富布褐蓬茅吾不知其貧  
心腹腎腸耳目口鼻吾不知其爲我也而况於二物  
乎吾將燒竹煮鶴而遊於無何之鄉矣吾何癖吾何  
癖居士閉口隱几而臥客不能難跼蹐而退居士姓  
某名某

一峯子



古今名賢  
三 碧梧丹鳳

○姑蘇夏正夫以禮部郎中遷江西憲副三載考最於天曹憲臺羣公繪碧梧丹鳳圖以象之倫曰鳳聖德也揭義而挾禮負仁而入信履文而繫武有道則見無道則隱善人國之鳳也在亂若鳳在治若鳳鳳爲聖人出也是故舜時來儀文王時鳴岐山舜文之聖朝陽之梧桐也皋夔稷契高崗之鳳凰也鳳以致鳳鳳之至也宜哉自周之東朝陽之梧桐秋矣孔子鳳而聖顏子孟子鳳而賢或老於曲肱或困於陋巷或卒於游說故曰鳳鳥不至吾已矣夫漢氏而下時



君之慕鳳于其名不于其實或以鶡雀爲鳳或以野  
鳥爲鸞鳳卒不可見也天下豈無鳳乎致之不以其  
道鳳之不至也宜哉其在下者雄欲鳳漢而棲于新  
室通欲鳳陳而儀於隋文君子若鳳謂隱見之得宜  
也雞非鳳比猶知曉晦之候鳳德固若是乎大江之  
西羣鳳之郊藪也濂溪之周氏草廬之吳氏象山之  
陸氏道德而鳳者也廬陵之歐陽氏南豐之曾氏文  
章而鳳者也若忠宣洪氏信國文氏之流則忠義而  
鳳者也天理不息則人心不死鳳固聖德然不離飛  
鳥也可以人而不如鳥乎同聲相應一鳳鳴而衆鳳



古今名  
皆鳴梧桐在朝陽矣候其以德爲首以仁爲心以信  
爲負以禮爲履以武爲繫引吭振羽而一鳴焉則羣  
鳳隨之舜文之瑞至矣吾將洗耳而聽於卷阿也

一峯

三九君子亭記

○陽明子旣爲何陋軒復因軒之前架楹爲亭環植  
以竹而名之曰君子曰竹有君子之道四焉中虛而  
靜通而有間有君子之德外節而直貫四時而柯葉  
無所改有君子之操應蟄而仁遇伏而隱雨雪晦明  
無所不宜有君子之時清風時至玉聲珊珊中采齊  
而協肆夏揖遜俯仰若洙泗羣賢之交集風止籟靜



挺然獨立不撓不屈若虞廷羣后端冕正笏而列于  
堂階之側有君子之容竹有是四者而以君子名不  
愧于其名吾亭有竹焉而因以竹名不愧于吾亭門  
人曰夫子蓋自道也吾夫子之居是亭也莊敬以直  
內靜虛而若通非君子之德乎遇屯而不懼處困而  
能亨非君子之操乎昔也行於朝今也行於夷順應  
物而能當雖守方而不拘非君子之時乎其交翼翼  
其處雍雍意適而匪懈氣和而能恭非君子之容乎  
夫子蓋嫌于自名也而假之竹雖然亦有所不容隱  
也夫子之名其軒曰何陋則固以自居矣陽明子曰



噫小子之言過矣而又弗及夫是四者何有于我哉  
抑學而未能則可謂云爾矣昔者夫子不云乎汝爲  
君子儒無爲小人儒吾之名亭也則以竹也人而嫌  
以君子自名也將爲小人之歸矣而可乎小子識之  
陽明子

平觀德亭記

○君子之於射也內志正外體直持弓矢審固而後  
可以言中故古者射以觀德德也者得之於其心者  
也君子之學求以得之於其心故君子之於射以存  
其心也是故躁於其心者其動妄蕩於其心者其視



浮歟於其心者其氣餒忽於其心者其貌惰傲於其  
心者其色矜五者心之不存也不存也者不學也君  
子之學於射以存其心也是故心端則體正心敬則  
容肅心平則氣舒心專則視審心通故時而理心純  
故讓而恪心宏故勝而不張負而不弛七者備而君  
子之德成君子無所不用其學也于射見之矣故曰  
爲人君者以爲君鵠爲人臣者以爲臣鵠爲人父者  
以爲父鵠爲人子者以爲子鵠射也者射已之鵠也  
鵠也者心也各射已之心也各得其心而已故曰可  
以觀德矣

陽明子



萬松記

○萬松子隱居於餘姚四明之山樹萬松以自寄孤松先生過謁焉曰何哉汪子之務博矣萬松子曰吾樂焉吾以萬聲嗚嗚供吾耳以萬色蒼蒼供吾目以萬蔭森森供吾身以萬材魁魁遺吾子孫吾以觀萬物之象不可乎孤松先生居于無名之鄉撫孤松而盤桓萬松子反詰焉曰何哉吾子之務約矣孤松先生曰吾樂焉吾以一聲供吾耳以一色養吾目以一枝自蔭以一材自負吾以當太乙之數不可乎他日胥以告於赤松子而折衷焉曰嗚呼孤松而知務約



而不知一聲有萬聲成之也一色有萬色成之也一  
蔭有萬葉也一材有萬枝也何約之務嗚呼萬松而  
知務博而不知萬聲一聲也萬色一色也萬蔭一蔭  
也萬材同根也何博之務汪氏之二子克惇克章皆  
舉進士與甘泉子游叔憲以告焉甘泉子曰憲僉胡  
爲乎萬一之辨也胡爲乎萬一之合也先子蓋命之  
矣萬一同原也可以知學矣夫松木德之中正也五  
德具焉故其好生似仁其後凋似義其條理似禮其  
枝一生汚下似智其脂化爲茯苓琥珀似神二子其  
學諸松焉則先子爲不朽矣其爲我寓諸叔厚也萬



松子名瑚字廷美後封爲大夫然而非奉制也

子甘泉

性善對

○秉之問於拙叟曰自昔言性者多矣至孟子而定至程子朱子而明後世言性者不能易也子亦有異聞乎曰無以異也子思子曰天命之謂性記曰人生而靜天之性也易曰繼之者善也成之者性也是皆性善之謂也吾又何言乎曰性吾知其善也其所以善吾不知也子其有以喻之曰子欲知爾之性之善乎盍反而內觀乎寂然不動之中而有至虛至靈者存焉湛兮其非有也窅兮其非無也不墮於中邊不



雜於聲臭當是時也善且未形而惡有所謂惡者哉  
惡有所謂善惡混者哉惡有所謂三品者哉曰性惟  
虛也惟靈也所謂仁義禮智者安從生曰性其猶鑒  
乎鑒者善應而不留物來則應物去則空鑒何有焉  
鑒無有而能有其有者也曰性惟虛也惟靈也則惟  
其善者也而惡安從生曰其生於蔽乎氣質者性之  
所寓也亦性之所由蔽也氣質異而性隨之譬之珠  
焉碌於澄淵上智是也碌於濁水凡庶是也碌於污  
穢下愚是也故曰氣質異而性隨之曰朱子曰氣以  
成形理亦賦焉天果物物而付之耶曰天地間充塞



皆氣也氣之靈則性也人得氣以生而靈隨之譬之  
月在天物各隨其分而受之江湖淮海此月也池沼  
此月也溝渠此月也坑塹亦此月也豈必物物而授  
之亦隨其所受而不同曰所謂虛靈者果性乎是心  
也非性也曰子以心性爲二乎心者月之魄也性者  
月之光華也情者光華之發於物者也非有異也曰  
子之言性也與諸儒同而亦有不同焉者將非韓愈  
氏所謂雜佛老而言之者乎曰非也孔子曰心之神  
明是謂性

守溪子



○嘉靖四年六月旣望予以事出吳興見有膝行泥中而以手左右去草者召而問之曰此芸田乎曰然曰吾邑之芸以鐵爲器而木柄之俯其身以盪撼于苗中未嘗若是難也曰州亦有之沙田草易除用之則宜泥田則根難拔必若是者三至焉山谿之田寒則根難死必若是者五至焉若稍弛之草侵吾苗數口之家將饑死于溝壑矣予聞而凜然人之情孰不惡勞而欲逸也以其惡死之急則奪惡勞矣以其欲生之急則奪其欲逸矣甚矣吾民厚生之難也然人知惡身之死而莫知惡心之死何也仁義之心人皆



有之存之則進于聖賢失之則入于禽獸是所欲有  
甚于生所惡有甚于死者草之害吾苗也竭力以去  
之利欲之害吾仁也憚其難而不知去其弗思焉耳  
質美者易於渾化猶沙田之草易除而不留也次則  
泥田矣次則山谿之寒田矣芸之而弗息草未有不  
拔而苗未有不秀且實者也嗚呼天下之勇於芸苗  
者寡矣欲斯民之無饑也胡可得哉予方困于饑餒  
思理百畝之荒以望于有秋而草盛苗希惴惴乎無  
所獲也今而後知所以芸吾田矣二三子咸欲厚其  
生也則盍於是焉圖之先難而後獲其庶矣乎

東郭子



四賀耕隱敖君壽序

○坪溪在邑南三十里有敖氏者世居之厥山崔巍厥水清冽鍾而爲人多剛介尚氣節君子以爲地之靈招之也有名文中者以豪俠自任一旦聞山泉子之風翻然悔悟忘年而請受業于門山泉子嘉其志亦盡其道以教焉逾年果有所得山泉子固辭之猶依依不忍去必期底于大成君子謂敖氏將興是故俾文中之克肖也今年九月九日尊甫耕隱君介六十之壽文中乃請曰願得夫子之言爲嚴君壽山泉子曰予惡能壽汝父哉壽汝父者是在子之身矣文



中瞿然曰敢問何謂也山泉子曰汝知汝父耕隱之說乎曰奚爲而不知也曰汝父之耕也必擇田之良者而後耕之乎曰然必播種乎曰然必有鎔基而後可耕乎曰然必去稂莠螟蟲而後苗可盛乎曰然必加灌溉之力而後苗可實乎曰然必待秋成之候而後刈乎曰然曰汝旣知之真矣是可以壽汝父矣曰意者以家君之耕也筋力勞而神氣固可以壽乎以家君之隱也名利捐而天真完可以壽乎曰是則汝父之自壽也而非汝之壽之也汝之壽之也亦惟若汝父之耕而已矣曰若是則弟子之惑滋甚願夫子



明以告我曰居吾語汝夫聖賢者良田也仁義忠信者穀種也經書者鎬基也物欲者稂莠螟螣也存養省察者灌溉之力也美大聖神者秋成之候也吾子于此而圖之必擇夫良田毋舍已之田而芸人之田也必慎布其穀種毋慕萁稗之易熟參之也必利其鎬基毋徒待其時之至也必勇決以去其稂莠螟螣毋留戀而弗舍也必時加灌溉之力毋怠惰自安不畷作勞也必優游以俟秋成之候毋堰而助之長也由是則苗而秀秀而實穰滿家而用之弗窮矣由是貢於天庖和羹惟需也薦于郊廟黍稷惟馨也布于



古今名論  
蒼生天下可以無醜也吾子勉之已之道行則父之道行已之澤溥則父之澤溥矣已爲聖賢則父爲聖賢之父矣其尊顯爲何如哉是則壽之大者予故曰壽汝父者是在子之身也不然予弗知之矣

張蓉

四五壽白耕居士

○吾友胡時振乃翁先生諱某字某別號白耕有詢者曰白耕之義可得聞乎曰白也者吾之分也耕也者吾之業也安吾分修吾業如是焉爾已是故越分以侈名其弊也僭捐業以娛時其失也荒二者皆非吾之所欲也詢者曰義或未止于茲乎曰白也者物



之質也耕也者民之本也世之上華而下質舍本根而事末流者吾見亦多矣吾深知夫華之不如質逐逐於末疇與究心於其本也乃用茲號自志焉而自服膺終身焉亦安所其他乎竹坡戚子聞而嘉之曰善哉胡君之志也不馳心以希外不遺事以苟安不逐流以循時不競浮以邀譽不希外可以語真不苟安可以語勤不逐流不競浮可以語實三者行之幾於道者也吾將進胡君以道乎夫道也者心也心也者性也性也者命也維天之命於穆不已其賦於人則謂之性其主於身則謂之心瑩乎其無疵粹乎



其無雜天下之至潔至潔者也聖人之心光明洞澈無纖毫私意污穢夫至潔之體聖人而下瑩者未免於疵粹者未免於雜矣是故君子有學焉所以去污以全潔者也胡君之白非吾之所謂至潔者與胡君之耕非吾之所謂去污以全潔者與是故天下之言白者未有不由于耕天下之能耕者未有不抵于白人是有是道而不知學焉是白而不耕也人知學矣而不求成焉是耕而不自也信能芟鋤灌溉時用其力不使一物蔓滋于隱微以戕賊夫本體恒久而不已焉安知至瑩至粹之妙有不復乎夫本體復而性由



此全命由此立矣壽其可量矣乎或曰子之進胡君  
於道廣矣大矣引考繇茲者何與曰奚待於是卽君  
之素行固以獲遐壽矣而復大道是究又安所窮其  
筭乎是故未有貞而不壽者外慕者多搖分守者寡  
累未有勤而不壽者惟戶樞無蠹惟流水不腐未有  
實而不壽者華脆則易落根結則難摧復繇此而進  
焉是故不動于欲則靜不撓于物則彊不放逸則存  
不播揚則歛先儒不云乎主靜則悠遠博厚自彊則  
堅實精明操存則氣血循軌而不亂收歛則精神內  
固而不浮胡君之壽雖由今日而指使而老傳而耄



古今名喻  
而期願無窮已也其可量矣乎今年某月某日君當  
懸弧宣大夫士各爲聲章頌贈予與時振交莫逆且  
辱君之知愛有素也媿不能文姑發白耕之義爲君  
贈宛陵竹坡子

古今名喻卷之八











